

POLELO EA MOHLOMPHEHI TONA-KHOLO NTATE PAKALITHA  
MOSISILI MP EA HO KHAKOLA PHARALATSO EA KHASO EA SE-  
EA-LE-MOEA LE THELEFISHENE, LESOTHO-MEAHONG EA  
KHASO MASERU- LA 07 'MESA 2008.

MOTLOTLEHI KHOSI LETSIE LA BORARO  
MOHLOMPHEHI MOOKAMELI OA NTLO EA SENATE  
MOHLOMPHEHI MOTSAMAI SI OA LIPUISANO LEKHOTLENG  
LA SECHABA  
MOHLOMPHEHI MOAHLOLI E MOHOLO  
MOHLOMPHEHI MOTLATSI OA TONA-KHOLO  
MOHLOMPHEHI MOOKAMELI OA LEKHOTLA LA MAIPILETSO  
BAHLOMPHEHI MATONA A KHABANE  
BAHLOMPHEHI BAAHLOLI BA LEKHOTLA LE PHAHAMENG  
BAHLOMPHEHI LITHO TSA LEKHOTLA LA NAHA  
YOUR EXCELLENCIES HEADS OF DIPLOMATIC MISSION AND  
HEADS OF INTERNATIONAL ORGANISATIONS  
MOHLOMPHEHI RAMOLAO E MOHOLO OA 'MUSO  
MOHLOMPHEHI RAMOTSE OA MOTSE-MOHOLO MASERU  
LITHO TSE KHABANE TSA PARAMENTE  
BALULA-SETULO BA LIKOMISI - EA KHIRO EA BAHLANKA BA  
SECHABA, E IKEMETSENG EA LIKHETHO, EA KHIRO EA  
LITICHERE, EA KHIRO EA BAHLANKA BA PUSO EA LIBAKA, LE  
EA NAHA EA AIDS  
MONGOLI E MOHOLO OA 'MUSO  
LIHLOOHO TSA LIKEREKE LESOTHO

BAETAPELE BA MEKHA EA LIPOLOTIKI  
BANGOLI BA BAHOLO BA MAKALA A 'MUSO  
BABUSI BA LITEREKE  
BALULA-SETULO BA MAKHOTLA A LITEREKE A PUSO EA  
LIBAKA LE LITHO TSA MAKHOTLA AO  
BAOKAMELI KA SESOLENG, SEPOLESA, MAUTLOELA LE LITSI  
TSA TLHABOLLO EA BATŠOARUOA  
BAOKAMELI BA LITSI TSA KHOEBO, HAHOLO-HOLO  
MEKONTERAKA E ATLEHISITSENG PHETHAHATSO EA  
MORERO OA LETSATSI LA KAJENO  
BAHLANKA BOHLE BA SECHABA  
BO-NTATE LE BO-'M'E LE LONA BANA BA KA,

Kea le lumelisa, 'me ke thabile haholo ho ba le lona kajeno mona meahong ea khaso, ho tla thakhola pharalatso ea khaso ea Se-ea-le-Moea le thelefishene, Lesotho.

Ha ke qale ka ho le hopotsa hore molaetseng oa ka oa Keresemese, ho sechaba sa Basotho, ke ile ka le bolella hore lekala la Likhokahanyo, Mahlale le Tšebeliso ea Mahlale, le ntse le le kahar'a morero o moholo oa ho atolosa khaso ea se-ea-le-moea le thelefishene ho pharalla le naha.

Ho phethahatsa morero ona, re qalile ka ho isa motlakase libakeng tsa tšebetso tse neng li se na oona. Ra nt'o eketsa bolelele ba litora tsa khaso Mokhoabong (Thaba-Tseka), Souru (Qacha's Nek) le Moyeni (Quthing); le ho hloma litora tsa thelefishene Chafo (Leribe),

Popa (Mokhotlong), Mokhoabong (Thaba-Tseka), Souru (Qacha's Nek), Moyeni (Quthing), Sehlabeng sa Thuathe (Berea Plateau) le Thaba- Putsoa (Maseru). Athe Mafeteng eona e se e ntse e imona monoana ka ho shebella thelefishene ea Lesotho.

Kajeno re boetse re etsa mokolokotoane o mong hape nalaneng ea khaso naheng ena ea rona haele mona re thakhola ho hokeloa hoa Se-ea-le-Moea sa Lesotho, Ultimate Radio le thelefishene ea Lesotho satelliteng. Hona ho tla thusa ho pharalatsa le ho ntlafatsa khaso Lesotho le kante ho meeli ea naha ena.

Re tlalehelo hore ho latela ntlafatso ena, thelefishene ea Lesotho e tla eketsa nako ea eona ea khaso ka lihora tse hlano ho qala ka hora ea bohano mantsiboea, ho isa horeng ea leshome bosiu. Ba ntseng ba sa fumane thelefishene ea Lesotho le se-ea-le-moea sa Lesotho, kajeno mathata a bona e se e le taba tsa maobane. Joale re ka tseba ho hlaba **patsane** ha masholu a re futuhela, esita le hona ho fetisa melaetsa e potlakileng hobane joale naha eohle le mathoko a eona e tla fumana melaetsa. Le Thojane joale re ka e leta ho tloha Tele ho ea Mechachane, le ka liqola tsohle tsa naha ena ea rona, esita le linaheng tse ahisaneng le rona.

## **BO-NTATE LE BO-'MÈ,**

Taba e 'ngoe ea bohlokoa eo ke e boleletsoeng, 'me eo ke ratang hore le e tsebe, ke hore lekala la Likhokahanyo, Mahlale le tšebeliso ea Mahlale le kene litumellanong le k'hamphani ea "Multichoice" ea

Afrika Boroa. Ho ea ka tumellano ena, thelefishene ea Lesotho, Se-ea-le-Moea sa Lesotho, le Ultimate Radio, li se li tla fumaneha ho “Digital Satellite Television” (DSTV).

Hona ho bolela hore Basotho ba nang le likotloloana tsa “satellite” ’me ba hoketsoe ho “multichoice,” ba se ba tla fumana Se-ea-le-Moea sa Lesotho, Ultimate Radio le thelefishene ea Lesotho ho DSTV. Batho ba nang le li-“aerial” empa ba se na likotloloana tsa multichoice, ba se ke ba li lahla, hobane ba ntse ba tla tsoelapele ho fumana thelefishene ea lesotho ka tsona.

Mothating ona, ntumelleng ke lebohe ba morero oa metsi a lihlaba (Lesotho Highlands Development Authority) haholo ka tlatsetso eo ba e entseng pharalatsong ea Se-ea-le-Moea sa Lesotho. Morero ona (LHDA) o tla hahla litora le ho kenya li-“transmitter” tsa FM ha Lebelonyana (Mphaki, seterekeng sa Quthing), Thaba-Phatšoa (Sehong-hong, seterekeng sa Thaba-Tseka), ha Sootho (Mantšonyane, le teng ke seterekeng sa Thaba-Tseka), le ha Katse hona seterekeng seo. Ruri rea leboha, re re le kamoso baheso. Le fela le entse letsoho la monna, etsoe **“matsoho a hlatsoana”,** **“letšoele le beta poho.”**

Re ka lebala joang motsoalle oa rona oa hlooho ea khomo e leng ’Muso oa People’s Republic of China. Le bona ha ba re tšabella, ba entse tlatsetso e kholo morerong ona oa pharalatso ea Se-ea-le-Moea le thelefishene tsa Lesotho. Ba ntse ba hahla litora ha Mokhele seterekeng sa Mohale’s Hoek, ba tla hahla le Kueneng seterekeng sa

Berea. Ba tla hloma le li-“transmitter” tsa “radio” le thelefishene ha khaho ea litora tsena e phethetsoe. Ho feta moo, ’muso oa China o tla fana ka mechine ea li-“generators” e tla lula e le malala-a-laotsoe hore ha motlakase o khaoha re ’ne re fumanae litšebeliso tsa Se-ea-le-Moea le thelefishene ho se be tšitiso e bakoang ke ho khaoha hoo.

Ke bolelloa hape hore ho tla ahoa tora ho be ho kenngoe “transmitter” ea “Medium Wave” (MW). Eona e tla etsa hore khaso ea Se-ea-le-Moea sa Lesotho e be e hlakileng naha ka bophara esita le kahar’a likhohlo, makoluopong le matsarankeng a naha ena ea rona. Ho feta mona, le Basotho ba phelang linaheng tse ahelaneng le rona, haholo-holo Afrika Boroa, ba tla tseba ho fumana Se-ea-le-Moea sa Lesotho ka nako eohle.

Bahlomphehi ba ka, mona joale le re otlile botsekeng rona ba phelang libakeng tse ka lithabeng, ba neng ba fumana Se-ea-le-Moea sa Lesotho ka thata. Re ne re sa lumele hore re sa tla tsoa lesoleng. Mananeo a kang a thuto a likolo, a temo, a bophelo, le a mang a mangata, re ne re sa khole molemo oa ’ona ka ha a ne a sa hlake kapa re sa a fumane ho hang. Ruri rea leboha ha e le mona Basotho bohle ba se ba tla tseba ho fumana Se-ea-le-Moea ’me ba fumane thuto le likeletso, ba rue tsebo.

Re leboha boikitlaetso ba ’muso oa Motlotlehi, tlatsetso ea Metsi a Lihlaba tsa Lesotho, le ea metsoalle ea rona ea hlooho ea khomo e leng ’muso oa China esita le metsoalle eohle ea naha ea rona e

entseng tsoho la monna ke mokolla tšebetsong ena ea bohlokoa. Efela manyesemane a ne a opile khomo lenaka ha a re **“a friend in need is a friend indeed”**.

Se-ea-le-Moea le thelefishene ke lintho tsa bohlokoa haholo bophelong le ntšetsong-pele ea naha efe kapa efe, esita le ho motho ka mong, ha li sebelisoa hantle. Ka tsona u ka haha kapa ua heletsa; u ka tšelisa kapa ua hlaba ka lerumo la kuebe; u ka tima hlaha kapa ua e hotetsa, ua ba ua e butsoela; u ka qala ntoa kapa ua e thiba; esita le mebuso e ka oa putla ha feela thepa ena e sebelisoa ka tsela e hlokang boikarabelo. Liphatlalatso tsena hantle-ntle li ka tšoantšoa le selepe. Joaloka ha re tseba, selepe se bohlokoa. Empa matsohong a lehlanya selepe e ka ba sebetsa se kotsi, se bolaeang le ho senya. Bolokolohi ba bophatlalatsi bo sebelisoe ka boikarabelo, ka hlomphe ea litokelo tsa ba bang.

Ka hona ke ipiletsa ho lona, sechaba sa thesele, ma-apara-kobo a matle, hore re sebeliseng litšebeletso tsa khaso hantle, e bang ke tsa sechaba kapa tse ikemetseng. Re li sebeliseng ho aha naha ena ea rona, e seng ho e arola. Re 'ne re utloe ha re bolelloa ka se ileng sa etsahala naheng ea Rwanda le tse ling ka baka la tšebeliso e mpe ea Se-ea-le-Moea. A re falimeheng ke hona. Re sebeliseng litsi tsena ka tsela eo re tla una molemo. Sechaba se etse tlatsetso mananeong ka litsela tsohle. Ho baloe buka, 'mino le lipapali tsa sesotho li re natefele, ho chorisoa puo, le litaba tsa nalane, meetlo le bochaba ba naha ena re li fumane. Ke re le tsona tsa pholoho re li

fumane, feela li se ke tsa re tsoafisa ho ea likerekeng le ho phetha litšoanelo tsa rona teng; e 'ne e be tlatsetso feela.

Se-ea-le-Moea le thelefishene ea Lesotho e tšoanela ho ba mokhoa oo basotho e le sechaba ba itlhahisang ka oona lichabeng tse ling. Boleng ba rona bo tšoanela ho bonoa le ho utluoa litsing tsena. Puo e ntle, e hlomphang, e mathe-maloli e utluoe le ho ithutoa litsing tsena. Mananeo e ke e be a rutang, a tlosang bolutu, a hloekileng, a rutang mekhoa e metle ea basotho. Bosotho pele ho meetlo ea lichaba tse ling. Lesotho ke naha ea bokeresete. Ho se ke ha buuo le ho bonoa lintho tse hlabisang lihlong, tse se nang botho tse fahlang mahlo, kapa tse hlohlontšang litsebe. Ho ke ho be le mananeo a ikhethang, a tlang ho hohela babohi hore ba bohe LTV ho fapana le tse ling. Taba ena e tla hloka boitelo le boikitlaetso ho ba sebetsang litsing tsena. Ba hopole hore ha se bona feela, ba tšoanela ho iketa le ho hapa thahasello ea bamameli le babohi.

Benghali ba ka, morero ona oo re o thakholang mona, o moholo haholo. Ka hona kea kopa, ke bile ke ipiletsa ho Basotho ka moka hore oho hle, a re baballeng thepa ena ea sechaba, hohle moo e leng teng, libakeng tseo ke li balileng le tseo ke sa li balang. Hohle moo le phelang teng, lea e bona, lea e tseba. Thepa ea sechaba ke thepa ea lona. E rekiloe le ho hlongoa mono ka likhafa tsa lona, bo-ntate le bo-'mè, le ka thuso ea metsoalle ea naha ea rona.

Ho sebelisitsoe chelete e ngata haholo ho atlehisa morero ona, ebile e ngata ke hona e ntseng e tla sebetsa ho fihlela mosebetsi o

phethetsoe. Ha ke lumele hore o teng motho ea ka ratang ho bona mosebetsi oa matsoho a hae o senngoa ka boomo le ka lonya. Ke ee ke bolele hore 'na lintho tse ntle kea li rata, etsoe “**ntho tse ntle lia iketsetsoa**”. Ka hona, re iketselitse lintho tse ntle ke tsena. A re beng mohau, re li baballe, re li boulele, hoba ke tsa rona re le sechaba. Ke sa boela ke pheta hore thepa ea sechaba ke thepa ea hau ntate; ke thepa ea hau 'mè; ke thepa ea hau mocha; ke thepa ea rona bohle. A re e baballeng ke hona. Re ruteng sechaba, haholo bana ba rona, molemo oa thepa ena, 'me re ba hlompise eona, le lisinyi li se bapalle ho eona.

Ka hona ke ipiletsa ho lona, sechaba sa heso, haholo-holo lona ba filoeng boikarabelo ba ho laola le ho tsamaisa matlo a khaso, ho ba hlokolosi ka thepa ena; ho e sebelisa le ho laola tšebeliso ea eona ka likelello tse pholileng; molemong oa naha ena le sechaba sena.

### **Ladies and gentlemen,**

Today's occasion affords us the opportunity to express our profound gratitude and appreciation to our friends and our development partners, whose generous financial assistance has made this project possible. In particular, we recognise the presence of Ambassador Qui Bohua of the People's Republic of China that has contributed in no small measure to make our dream of ages come true. We are indeed grateful, your Excellency, for this invaluable support. Let us all use these facilities responsibly. Freedom of expression does not

give anyone license to defame others, particularly those who hold public office.

### **Bo-ntate le bo-'mè**

Ntumelleng ke phethele puo ena ea ka ka ho boela ke leboha lebitsong la 'muso le sechaba sa basotho, bohle ba kentseng letsoho ho phethahatsa toro ena ea rona ea nako e telele. Re leboha ba re tlatselitseng ka lichelete, re leboha mekonteraka le litsebi ka mekhahleho e fapakaneng, ba sebelitseng ka thata nyene le bosiu hore ebe re mona moo re leng teng kajeno.

Ho re saletseng joale, beng ba ka, ke hore re holiseng tšebeliso ea Se-ea-le-Moea le TV ho anetsa thuto le ho ntlafaletsa Basotho bophelo. A re sebeliseng Se-ea-le-Moea le TV ho etsa tlatsetso kholisong ea moruo, bofuma bo fele!

**Khotso le Nala li atele Basotho.**